

ILUARSISSUT

Ataatsimiititaliap isumaliutissiissutaa 8. november 2021-mik ullulerneqarsimasoq taarserpaa

(Ataatsimiititaliap allannguutissatut siunnersuutaata kalaallisuanik iluarsineq)

Naalakkersuisut Kommune Qeqertalimmi aamma Avannaata Kommuniani campusimik pilersitsinissaq siunertaralugu suliniutit suut aallartinneqassanersut misissueqqullugit peqquneqarnissaannik Inatsisartut aalajangiiffigisassatut siunnersuut. Misissuinermi ilaatigut qulaajarneqassapput, Aasianni GUX-ip pitsaassusaanut aammalu tiguneqarnissamut toqqammavigisat allannguutaanngitsumik, Ilulissani GUX-imik pilersitsinissamut suliniutit pisariaqartut. Misissuineq juli 2022 naatinnagu saqqummiunneqassaaq

Doris Jakobsen Jensenimit, Siumut, saqqummiunneqartoq

aamma

Nuna tamakkerlugu Aasianni inuussutissarsiornermik ilinniarfiliortoqassappat pittaaqutaanik ajoqutaanillu nassuiaammik UPA2023-imi saqqummiusseqqullugit Naalakkersuisut peqquneqarnissaannik Inatsisartut aalajangiiffingisassaatur siunnersuut. Naalakkersuisut nalunaarusiornerminni ilinniartitaanerup iluani inuussutissarsiornermik ilinniarfimmik nutaaliorfiusumik nutaamik sanasoqarnissaanut pisariaqartitsisoqarnera eqqarsaatigissavaat

Kristian Jeremiassenimit, Inuit Ataqtigiit, saqqummiunneqartoq

pillugit

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap

siunnersuutit aappassaaneerpeqarnerannut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Sofia Geisler, Inuit Ataqtigiit, siulittaasoq

Inatsisartunut ilaasortaq Doris Jakobsen Jensen, Siumut, siulittaasup tullia

Inatsisartunut ilaasortaq Mariia Simonsen, Inuit Ataqtigiit

Inatsisartunut ilaasortaq Nivi Olsen, Demokraatit

Inatsisartunut ilaasortaq Mette Arqe-Hammeken, Naleraq

UKA2021-mi ulloq 20. oktober aamma 21. oktober siullermeerinninnerup kingorna ataatsimiititaliap siunnersuutit misissorpai.

1. Siunnersuutit imarisaat siunertaallu

Siunnersuutit marluk matumani pineqartut assigiissuteqarput, tassa siunnersuutit tamarmik nunatta avannaani ilinniarfinnik nutaanik pilersitsinissamut tunngammata. Kommune Qeqertalimmi aammalu Avannaata Kommuniani campusimik kiisalu Aasianni GUX-imi pitsaassusermut ilinniartuutigisassanullu tunngavimmut allannguutaanngitsumik Ilulissani GUX-imik pilersitsinissaq siunertaralugu suliniutit suut aallartinneqassanersut misissoqullugu Naalackersuisut peqquneqarnissaat immikkoortoq 95-imi anguniarneqarpoq.

Nuna tamakkerlugu Aasianni inuussutissarsiornermik ilinniarfiliortoqassappat pitsaaqutai ajoqutaalu pillugit nassuiaasiornissamik tamatumalu peqatigisaanik inuussutissarsiornermik ilinniarfimmik nutaaliorsiumik nutaanik sanasoqarnissaanut pisariaqartitsisoqarneranik naliliinissamik Naalackersuisut peqquneqarnissaat immikkoortoq 107-imi siunertaavoq.

2. Ataatsimiititaliap siunnersuutinik suliarinninnera

Ilinniarnernik aammalu ilinniarfinnik nutaanik pilersitsinissami taakku suliffeqarnikkut amigaatigineqarnerannik pinerit tamaasa sanilliussisarnissarput pingaaruteqarmat ataatsimiititaliamit aallarniutigalugu oqaatigineqassaaq. Ilaatigut Aningaasaqarnermut Siunnersuisoqatigiinnit uppersarneqartumik ilisimaneqarpoq sulisussat piginnaasallit amigaataanerat annertoorujussuusoq. Suliffeqarnermi amigaatigineqartut nammineerluta matussusernissaat anguniassavarput. Innuttaasut 56.500-innatilluta tamanna angujuminaassinnaavoq. Tamannarpiarlu pissutigalugu ilinniartitaanermut tunngasunik pingaarnersiulluni tulleriiaarinerup sukumiisumik isumaliutiginnissaa pisariaqarluinnarpoq.

Ilinniarfinnik nutaanik pilersitsinissamut periarfissat misissorneqarnissaat siunnersuutini ukunani marlunni siunertarinqarpoq, ilinniarfiilli suliffeqarnermi pisariaqartinneqartunut naapertuunnersut annertunerusumik sammeneqarani. Siunnersuutit Inatsisartunit akuerineqassappata isumaliutit taamaattut misissuinermi ilanngunneqarnissaat ataatsimiititaliamit pingaaruteqartutut isigineqarpoq. Suliffeqarnermi minnerunngitsumik Kommune Qeqertalimmi aammalu Avannaata Kommuniani pisariaqartitat, Naalackersuisunit ilisimaneqareersimappata, aappassaaneerinninnermi naatsumik nassuiaatigineqarnissaat ataatsimiititaliamit qujarunneqassaaq.

Tamatuma saniatigut immikkoortoq 95-imut Siumut allannguutissatut siunnersuuteqarpoq. Immikkoortoq 107-imut Naalackersuisut allannguutissatut siunnersuuteqarput.

2.1. Campus

Campus aallaavimmini piffimmik ammasumik isumaqarpoq aammalu ilisimatusarfeqarfinnut atatillugu atorneqarajulluni. Maani nunatsinni allaanerulaarpoq, taassami campusigut imaanngimmat ilisimatusarfinnut attuumassuteqartut. Nunatsinni campusit assigiinngitsut pingasut pigivavut; Campus Sisimiut, Campus Ilmarfik aamma Campus Kujalleq. Campusit taakku pingasut tassaapput suliffeqarfiit assigiinngitsut ataatsimoortitat, tamatumaniilu assersuutigalugu Campus Kujalleq ilisimatusarfimmut attuumassuteqanngilaq.

Campusi nunatsinnut tunngatillugu ilinniarfiit akimorlugit suleqatigiinnermut tunngasoq, tamatumaniilu sunniivigeqatigiinnikkut iluaqutissanik pilersitsinissaq amerlasuutigut siunertaasartuq, immikkoortoq 95-imut akissuteqaamminni Naalakkersuisut paasissutissiissutigaat. Taakkulu ilinniarfiit akornanni suleqatigiinnerit piusut tunngavigalugit pilersitaapput, tassalu qitiusumit siumoortumik pilersaarusiugaanatik. Taamaallunilu ataatsimiititaliap paasinninnera malillugu Naalakkersuisut sulissutiginninnerisigut campusit pilersinneqarsimangillat, ilinniarfiilli namminneq sulissutiginninnerisigut pissusissamisoortumik ineriartornerusimallutik.

Tamannalu pissutigalugu Kommune Qeqertalimmi aammalu Avannaata Kommuniani campusimik pilersitsinissami suut suliniutigineqartariaqarnerisa qitiusumit misissorneqarnissaat ajornakusuussasoq ataatsimiititaliaq isumaqarpoq. Taamaattumillu Ilulissani Perorsaanermik Ilinniarfiup siunnersuuteqartullu eqqarsaataata Ilulissani GUX-ip sunniivigeqatigiinnikkut iluaqutissartarisinnaasaat misissuinermi Naalakkersuisunit isumaliutigineqarnissaat naapertuuttutut ataatsimiititaliamit isigineqarpoq. Isumaliutinullu taakkununga suliniutit immikkoortoq 95-imut akissuteqaammi allassimasut ilanngunneqarsinnaapput, minnerunngitsumik Perorsaanermik Ilinniarfimmi inuiaqatigiinnut tunngasunik ilinniarfitaanernik nutaanik ineriartortitsinissaq aammalu Ilulissani silaannaap pissusaanut tunngasumik ilinniarfimmik pilersitsinissaq.

2.2. Inussutissarsiornermik ilinniarfiit

Inuussutissarsiutinik ilinniartitsinermit, tassungalu ilanngullugu inuussutissarsiutinik ilinniarfinnut tunngasumik aalajangersakkat Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaanni nr. 10, 19. maj 2010-meersumi maleruagassiuunneqarmata ataatsimiititaliamit aallarniutigalugu oqaatigineqassaaq. Tassani inuussutissarsiutinik ilinniarfiit imarisaannut atuuffiinullu tunngasumik aalajangersakkat allassimapput. Immikkoortoq 107-imut pingaarutilik ilaatigut tassaavoq § 2, imm. 1., tassani tunngaviusumik inuussutissarsiutinik ilinniartitsineq ima nassuiarneqarpoq:

”Tunngaviusumik inuutissarsiutiniq ilinniartitsineq tassaavoq paarlakaattumik ilinniarnaq, sungiusarluni sulinerup ilinniarfimmiiinnerullu paarlakaaffigisaat. Tunngaviusumik inuutissarsiutiniq ilinniartitsinermut ilaapput tunngaviusumik atuartsissutit, atuartsissutit suliamut tunngasut, atuartsissutit immikkut ittut aamma atuartsissutit nammineq toqqagassaajunnartut, piunasaqaataallunilu lærlingit imaluunniit ilinniartinneqarnissamik isumaqatigiissuteqartoqarsimanissaa, qinnuteqartoq atuatigaluni sungiusartut ilinnialersimangippat, tak. § 10, imm. 4.”

Inuussutissarsiornermik ilinniarfimmik nutaaliorsiumik nipilersornermik imaluunniit avammut niuernermut sammisumik aallaavilimmik pilersitsinermi pitsaaqutitut ajoqutinnullu inatsimmi § 2, imm. 1-imi aalajangersakkat qanoq sunniuteqarnerisa isumaliutigilluarneqarnissaa immikkoortoq 107-imi nassuiaatissatut kissaatigineqartumut pingaaruteqartoq ataatsimiititaliaq isumaqarpoq. Tamatumani minnerunngitsuiq eqqarsaatigineqarput sungiusarluni sulinerup ilinniarfimmiiinnerullu akornani pissutsit.

Taamatuttaaq inuussutissarsiutiniq ilinniartitsinerit aamma inuussutissarsiutiniq ilinniartitsinerup iluani pikkorissaanerit pillugit Inatsisartut inatsisaanni nassuiaatigineqartut inuussutissarsiutiniq ilinniartitaanerup qanoq siunertaqarluni aaqqissuunneqarnera nassuiaammi eqqumaffigineqarnissaa ataatsimiititaliaq pingaaruteqarpoq. Ilinniartitsinernik aaqqissuussineq annertunerpaamik pissutsinut sisamanut makkununga naapertuuttunngorlugu aaqqissuuneqassasoq inatsimmi § 1, imm. 2-mi allassimavoq:

- 1) *inuusuttut ilinniarnissamut kaammattorneqarnissaat, aamma inuusuttut inuutissarsiutiniq ilinniagaqarumasut imaluunniit inuutissarsiutiniq ilinniartitsinermut tunngasutigut pikkorissarumasut tamarmik piviusunik periarfissaqarnissaasa qularnaarnissaat aamma ilinniakkat pikkorissarnerilluunniit amerlanerusut akornanni toqqaasinnaannissaat,*
- 2) *inuusuttunik siunissami sulillutik inuunissaannut, inuttut ineriartornissaannut aamma inuiaqatigiinnik ineriartornerannillu paasinninnissaannut tunngavissiumik ilinniartitsinissaq,*
- 3) *suliffissaqartitsiffiit inuutissarsiutiniq sulianut tunngasutigut nalinginnaasumillu piginnaasariaqartutigut pisariaqariaqartitaasa piviusunngortinnissaat - inuutissarsiutitigut inuiaqatigiinnilu ineriartornermut naleqqiullugit, tamatumunnga ilanngullugit inuutissarsiuteqarnerup ilusiligaanermigut ineriartornera, suliffissaqartitsiniarnermi pissutsit ineriartornerat, suliffiit aaqqissugaanermikkut teknikkikkullu ineriartornerat aamma*
- 4) *ilinniartut Kalaallit Nunaanni avataanilu ilinniaqqinnissamut tunngavissinnissaat.*

Inuusuttut ilinniartut, taakku pisariaqartitaat inuiaqatigiillu ataatsimut isigalugit pissutsini siuliani taaneqartuni akuleriisillugit isiginiarneqartut ataatsimiititaliamit maluginiarneqarpoq. Immikkoortoq 2-mi aallarniutigalugu oqaatigineqartutut ilinniartitaanikkut inuiaqatigiinni iliuutsit inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaanni aalajangersakkanut tigussaasunut aamma atatinneqartariaqartut ataatsimiititaliaq isumaqarpoq. Taamaattumillu misissuinermik suliaqarnermi pissutsit taakku sisamat pitsaaqutinut ajoqutinullu ilanngunneqarnissaat ataatsimiititaliamit kaammattuutigiumaneqarpoq.

Siunnersuuteqartup inuussutissarsiornermik ilinniarfik “nutaaliorfiusoq” immikkut qitiutikkaa immikkoortoq 107-imut tunngatillugu ataatsimiititaliap oqaatigissavaa. Ataatsimiititaliap paasinninnera malillugu tamatumani pineqarpoq nipilersornermik ilinniarfik inuussutissarsiornermik ilinniarfittut ingerlasoq. Ataatsimiititaliamulli ersarluppoq inuussutissarsiornermik ilinniarfimmi “nutaaliorfiusumi” pissutsit allat qitiutinneqarnissaat siunnersuuteqartumit kissaatigineqarnersoq. Tamatuma saniatigut inuussutissarsiornermik ilinniarfimmik avammut niuernermit sammisumik pilersitsinissap nassuiaatigineqarnissaa siunnersuuteqartup kissaatigaa. Tamatumani ilinniarnert aatsitassanut, pinneraasiornermut kiisalu kuultinik sölvinillu saffiornermut tunngasut siunnersuuteqartup nammineq taavai, aammalu ilinniartitaanernik allanik sammiveqartunik Naalackersuisut ilanngussinissaat ammaallugu. Ilinniartitaanerit allat siunnersuutip aappassaaneerneqarnerani naatumik isummerfigeqqullugit Naalaackersuisut ataatsimiititaliamit kaammattorneqarput. Taamatuttaaq siunnersuut matumani pineqartoq imaluunniit allannguutissatut siunnersuutit attuumassuteqartut akuerineqassappata ilinniartitaanerit assigiinngitsunik sammivillit akornanni sunniivigeqatigiinnikkut iluaqutissat qitiutillugit sammineqarnissaat ataatsimiititaliamit kaammattuutigineqarpoq.

2.3. Siunnersuisoqatigiit ataatsimiititaliallu Naalackersuisunit pilersitat

Qulequttanik inuussutissarsiornermik ilinniartitaanermut tunngasut aammalu taakkununga tunngasumik suliffeqarnermi inuussutissarsiornermilu ineriartornermik suliarinnittartussanik siunnersuisoqatigiinnik ataatsimiititaliamilluunniit pilersitsinissamik kissaateqarneq immikkoortoq 95-imut aamma immikkoortoq 107-imut akissuteqaamminni Naalackersuisut oqaatigaat. Aalajangersakkat taakku Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaanni nr. 10, 19. maj 2010-meersumi § 4-mi maleruagassiuunneqarput.

Suliniutit suugaluartulluunniit inuussutissarsiornermik ilinniartitaanermut tunngasuni ilinniarnernik ilinniarfinnullu nutaanik pilersitsinissamik aalajangiinissamut pitsaanagerusumik

tunngavissiisut ataatsimiititaliap pitsaasutut isigai. Tassunga atatillugu isumaliutit aallarniutaasut siunnersuutillu siullermeerneqarneranni oqaatigineqartut Naalakkersuisunit erseqqinnerusumik nassuiaatigineqarnissaat ataatsimiititaliamit kaammattuutigineqarpoq.

2.4. Siumup immikkoortoq 95-imut allannguutissatut siunnersuutaa:

Immikkoortoq 95-imik siullermeerinninnermi Siumut allannguutissatut siunnersuummik imaattumik saqqummiussisut ataatsimiititaliamit oqaatigineqassaaq:

”Naalakkersuisut Avannaata Kommuniiani Ilinniarnertuunngorniarfimmik pilersitseqqullugit peqquneqarnissaannik inatsisartut aalajangiiffigisassaattut siunnersuut. Ilinniarnertuunngorniarfimmii Silaannaap allanngoriartorneranik ilinniartitsineq, Pinngortitamik atuilluarnermik tunngaveqartumik ilinniartitsineq, piujuaannartitsineq aallaavigalugu nunaqavissunik peqateqarluni ilinniartitsineq, pisuussutinik pigisatsinnik naleqarnerulersitsineq kiisalu kulturitta aningaasarsiutitut inuussutissarsiutaasinnaaneranik ilinniartitsinerit tunngavigineqarlutik ilinniarnertuunngorniarfimmik pilersitsineq aaqqissuunneqassaaq.”

Siunnersuutaaqqaartumi aningaasatigut killiliussat allannguutissatut siunnersuutikkut annertuumik annertuseriartinneqartut ataatsimiititaliaq isumaqarpoq, taamaalillunilu allannguutissatut siunnersuutip aningaatigut kingunerisassai siunnersuutaaqqaartumut naapertuutinngillat. Taamaalillunilu siunnersuutit assigiinnertik pissutigalugu imminnut naapertuutinngillat. Tamatuma kingunerisaanik allannguutissatut siunnersuut akuerineqassappat Naalakkersuisut malinninnissamat pisussaaffeqassannngillat.

Ilinniarnertuunngorniarfimmik nutaamik pilersitsinerup aningaasatigut kingunerisassai ataatsimiititaliamit erseqqinnerusumik ilisimaneqannngillat. Ilinniarnertuunngorniarfimmik nutaamik pilersitsineq assut aningaasartuutaasussatut ataatsimiititaliamit isumaqarfigineqarpoq, taamatuttaaq ilaatigut ilinniartunngortartut eqqarsaatigalugit Aasianni GUX-imut pitsaanngitsumik kinguneqarsinnaavoq.

Ilinniarnertuunngorniarfik silap allanngoriartorneranut, avatangiisinut, imminut napatittumik ingerlatsinermut, kulturimut, aningaasaqarnermut aammalu inuussutissarsiornermut sammivilik aammalu najukkami nukiit suleqatigineqarnerannut atasoq ataatsimiititaliamit assut pitsaasutut isigineqarpoq. Tamanna paasissutissanik erseqqinnerusunik tunngavissaqarluni isummerfigineqassasoq ataatsimiititaliaq isumaqarpoq.

2.5. Naalakkersuisut immikkoortoq 107-imut allannguutissatut siunnersuutaat:

Immikkoortoq 107-imik siullermeerinninnermi Naalakkersuisut allannguutissatut siunnersuummik saqqummiussisut ataatsimiititaliamit oqaatigineqassaaq.

”Inatsisartut aalajangiiffigisassaattut siunnersuut, Naalakkersuisut peqquneqassasut nassuiaammik UPA 2023-mut saqqummiusseqqullugit, iluaqutaasinnaasut aamma ajoqutaasinnaasut pillugit nunamut tamarmut atuuttumik inuussutissarsiornermut ilinniarfimmik nutaaliorfiusumik pilersitsisinnaaneq pillugu.”

Naalakkersuisut matuminnga allannguutissatut siunnersuuteqarnermikkut nunap immikkoortua aallaavigalugu misissuinerup nuna tamaat isigalugu misissuinermut annertusineqarnissaa kissaatigimmassuk ataatsimiititaliamit naapertuuttutut isigineqarpoq. Taamaaliornikkut inuussutissarsiornermik ilinniarfiup nutaaliorfiusup nunatsinnilu tamarmi ilinniarfiit piusut akornanni sunniivigeqatigiinnikkut iluaqutissarsiffiusinnaasut naliliiffiginerat ilanngunneqarsinnaalissaaq. Tamatumani ataatsimiititaliamit aamma naatsorsuutigineqarpoq inuussutissarsiornermik ilinniarfimmi nutaaliorfiusumi ilinniarnerit akornanni sunniivigeqatigiinnikkut iluaqutissarsisoqarsinnaassasoq.

Misissuinissap nunap immikkoortuanik aallaaveqartup nunamut tamarmut atuuttussanngorlugu annertusineqarnera siunnersuutaaqqaartumi aningaasatigut kingunerisassatut allassimasut iluanni ingerlanneqarsinnaasoq ataatsimiititaliaq isumaqarpoq. Tassa ilaatigut sulineq oqaloqatiginninnerlu ingerlateqqinneqarsinnaasut Naalakkersuisunit aallartinneqareersimmata ilaatigullu allannguutissatut siunnersuutip malitsigisaanik aningaasaqarnikkut kingunerisassat annertunerusumik oqaaseqarfiginissaat Naalakkersuisut akissuteqaamminni pisariaqartutut isigisimannngimmassuk.

Siuliani allassimasutut “nutaaliorfiusumik” oqarnermi nipilersornermik ilinniarfik inuussutissarsiornermik ilinniarfittut atuuttoq pineqartoq ataatsimiititaliaq isumaqarpoq. “Nutaaliorfiusumik” oqarnermi pissutsit allat ilanngunneqassanersut ataatsimiititaliamit ilisimaneqanngilaq. Taamaattoqassappat siunnersuutip aappassaaneernejarnerani tamanna isummerfigeqqullugu Naalakkersuisut ataatsimiititaliamit kaammattorneqarput.

Nassuiaat UPA2023 sioqqullugu Naalakkersuisunit saqqummiunneqarsinnaassappat naapertuuttutut ataatsimiititaliamit naggasiullugu isigineqarpoq, tassami sulineq aallartereernejarsimasorinarmat.

3. Siunnersuutit aningaasaqarnikkut kingunerisassaat

Aalajangiiffigisassatut siunnersuutip piviusunnngortinneqarnerata aningaasaqarnikkut allaffissornikkullu kingunerisassai siunnersuummut tunngavilersuummi allaaserineqassasut Inatsisartut suleriaasianni § 33, imm. 1-imi allassimavoq.

Immikkoortoq 95: Siunnersuutip piviusunnngortinneqarnerani aningaasatigut kingunerisassat Inatsisartut suleriaasiat naapertorlugu siunnersuummi nalunaarneqartut ataatsimiititaliamit maluginiarneqarpoq. Misissuinermit aningaasartuutit 500.000 kr.-inut tagginneqarput.

Immikkoortoq 107: Siunnersuutip piviusunnngortinneqarnerani aningaasatigut kingunerisassat Inatsisartut suleriaasiat naapertorlugu siunnersuummi nalunaarneqartut ataatsimiititaliamit maluginiarneqarpoq. Misissuinermit aningaasartuutit 500.000 kr.-it aamma 1.000.000 kr.-it akornanniittussatut tagginneqarput.

4. Ataatsimiititaliap inassuteqaatai


Immikkoortoq 95-imut ataatsimiititaliaq isumaqatigiittoq matumuuna allannguutissamik siunnersuummik saqqummiussivoq:

”Kommune Qeqertalimmi aamma Avannaata Kommuniani ilaatigut GUX-imik, inuussutissarsiutinut ilinniarfinnik qaffasinnerusumillu ilinniarfinnik pisariaqartitsinernik, periarfissanik kingunerisassanillu qulaajaaviumik UPA23-mut misissuinermit suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermit kommunit ilinniartitaanerillu attuumassutillit, kiisalu ilinniartitaanermut tunngasuni misilittakkat suliniutillu ingerlasut sapinngisaq tamaat ilaatinneqassapput.”

Immikkoortoq 107-imut ataatsimiititaliaq isumaqatigiittoq matumuuna allannguutissamik siunnersuummik saqqummiussivoq:

”Kommune Qeqertalimmi aamma Avannaata Kommuniani ilaatigut GUX-imik, inuussutissarsiutinut ilinniarfinnik qaffasinnerusumillu ilinniarfinnik pisariaqartitsinernik, periarfissanik kingunerisassanillu qulaajaaviumik UPA23-mut misissuinermit suliaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermit kommunit ilinniartitaanerillu attuumassutillit, kiisalu ilinniartitaanermut tunngasuni misilittakkat suliniutillu ingerlasut sapinngisaq tamaat ilaatinneqassapput.”

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Sofia Geisler
Siulittaasoq



Doris Jakobsen Jensen
Siulittaasup tullia



Mariia Simonsen



Nivi Olsen



Mette Arge-Hammeken